

四庫全書

史部

欽定四庫全書

史部
通志卷四十一

詳校官侍讀_臣陳萬青

編修_臣裴謙覆勘

覆校官助教_臣金學詩

校對官典簿_臣劉光第

謄錄監生_臣王寶唐

欽定四庫全書

通志卷四十一

宋 右迪功郎 鄭 樵 漁仲 撰

都邑略第一

都邑序

建邦設都皆馮險阻山川者天之險阻也城池者人之險阻也城池必依山川以為固大河自天地之西而極天地之東大江自中國之西而極中國之東天地所以

設險之大者莫如大河其次莫如大江故中原依大河
以為固吳越依大江以為固中原無事則居河之南中
原多事則居江之南自開闢以來皆河南建都雖黃帝
之都堯舜禹之都於今皆為河北在昔皆為河南大河
故道自碣石入海碣石今平州也所以幽薊之邦冀都
之壤皆為河南地周定王五年以後河道堙塞漸移南
流至漢元光三年徙從頓丘入渤海今濱滄間也自成
周以來河南之都惟長安與洛陽或逾河而居鄴者非

長久計也自漢晉以來江南之都惟有建業或據上流而居江陵武昌者亦非長久計也是故定都之君惟此三都是定議都之臣亦惟此三都是議此三都者雖曰金湯之業屢為車轂之場或歷數百載或禪數十君高城深池塹山堙谷斷土既多地絕其脉積污復久水化其味此隋人所謂不甚宜人者也而况衝車所攻矢石所集積骸灑血莽為荆榛斷垣壞壁鬼燐滅沒由茲鳩集能必其蕃育乎唐之末年博士朱朴獻遷都之議曰

古之帝王不常厥居皆觀天地興衰隨時制事關中周
隋所都我實因之凡三百歲文物資貨奢侈僭偽皆極
焉廣明巨盜陷覆京闕高祖太宗之制蕩然矣夫襄鄧
之西夷漫數百里其東則漢與鳳林為之闕南則菊潭
環屈而流屬於漢西有上洛重山之險北有白崖聯絡
誠形勝之地沃衍之墟若廣浚河渠漕輓天下可使大
集自古中興之君去已衰之衰就未王而王今南陽光
武雖起而未王也臣視山河壯麗處多故都已盛而衰

難可興已江南土薄水淺人心囂浮輕巧不可以都河
北固水深土厚而人心彊愎狼戾未即可服襄鄧既為
內地人心質良去秦咫尺而有上洛為侵軼之限此建
都之極選也疏奏在廷無有是其說者豈以其人無足
取故并廢其言與然其論去已衰之衰就未王而王則
前此或未有之及矣臣竊觀自昔帝王之都未有建宸
極於汴者雖晉之十六國徧處中州亦未聞有據夷門
者何哉蓋其地當四戰之衝無設險之山則國失依馮

無流惡之水則民多疾癘七國之魏本都安邑為秦侵蝕不得已東徙大梁秦人卒決河流以灌其城王假就虜一國為魚焉自是曠千三四年無有居者朱全忠藉宣武資力以篡唐因而居汴未為都也不及五六年梟鏡殞命昏庸繼位或獻遷都之謀君臣皆謂夷門國家根本不可遽易遂為京室唐兵之來梁室之禍甚於王假晉遵覆轍邪律長驅取少帝如拾芥視朱氏又酷烈焉宋祖開基大臣無周公宅洛之謀小臣無婁敬入關

之請因循前人不易其故逮至九朝遂有靖康之難豈其德之不建哉由地勢然爾六飛南巡駐蹕吳越朝曰行闕陵曰殯寢此豈絕念於卜宅哉咸陽邾鄆我陵我阿湯湯秦淮一葦可至而臣鄰未聞以定鼎之謀啟陳者毋亦以殘都廢邑土脉絕水泉鹵不足復興而夷門之痛況未定也嗚呼江沱不足宴安也毋已則採唐人之議取南陽為中原新宅且以繫人望云

三皇都

伏犧都陳

宛邱城是也今陳州治周武王封舜之後於此

神農都魯或云始都

陳

魯今兗州曲阜縣故又云神農營曲阜

黃帝都有熊又遷涿鹿

有熊今鄭州新

鄭涿鹿

即涿州

五帝都

少昊都窮桑

即魯曲阜也故曰封伯禽於少昊之墟

顓帝都高陽

澶州濮陽縣以

顓帝居之故謂之帝邱其城中有顓帝冢存焉

帝嚳都亳亦謂之高辛

即偃師縣今隸

西京帝嚳為高辛氏故都亦謂高辛

堯始封于唐後徙晉陽即帝位都平

陽

唐今定州唐縣猶有唐城存焉或云唐城在絳州翼城西二里及徙晉陽則以晉陽為唐今平定軍有古

晉陽城是其地及為天子都平陽則又以平陽為唐平陽今晉州也

都蒲坂

虞即南京虞城縣蒲坂隋改為河南縣今隸河中府

夏都

禹封於夏受禪之後都平陽又徙安邑

夏今陝州夏縣安邑今隸蒲州

平陽即堯都也禹在陽城者避商均之地而非都也按五子之歌曰惟彼陶唐有此冀方言堯舜及禹皆在冀州界少康中興復還舊都故左傳曰復禹之迹不失舊物

商都

契封於商後世遷于亳即西亳也成湯受命始遷于南

亳故命以殷至仲丁遷于囂河亶甲居于相祖乙居于

耿及盤庚五遷復都南亳至紂居朝歌

商即上維今為商州亳故京兆

杜縣有亳亭是也杜城今在長安南故司馬遷云禹興西羌湯起亳也及湯有天下始居宋地復命以亳今南京穀熟是也或云河南偃師是蓋有澠水出陽城東至西華汝陽入于潁與潁水合流古人并謂潁為澠故命以澠焉此謂之南亳囂亦作教即河南之教倉也相今為相州耿河中府龍門縣南十二里故耿城是朝歌隋改為衛縣衛州朝歌故城有縣西二十里衛縣熙寧中省為鎮入黎陽

夏商之際諸侯都

昆吾

夏之伯國杜預云東都濮陽縣按唐武德四年析濮州濮陽置昆吾縣復舊名也八年復省入濮陽

大彭

商之伯國今徐州彭城是也

豕韋

亦商之伯國或謂之韋杜預云東郡白馬縣東南有韋城

按今滑州韋城是也有豕龍井在韋城古城之內

唐杜

唐杜一國名商末豕韋國於唐周成王滅唐而

遷之於杜為杜伯唐今定州唐縣杜在永興軍長安縣南十五里曰下杜城猶有杜伯冢在焉顧夏之

國濮州范縣東南二十里里有故顧城

六

廬州舒城東南六十里有故六城虞夏之際封臯陶於此蓼

壽州霍邱縣六蓼皆虞夏所以封臯陶

扈

夏為扈商為崇秦改扈為鄆今鄆縣北二十里有故扈城城周

四里亦有甘亭即啟與有扈戰處

鉏

故鉏城在澶州衛南縣東十五里此界本國界後遷于窮石

寒

寒浞之國今濰州東二十三里寒亭是也

斟灌

夏同姓國杜預云樂安壽光縣東南有灌亭按壽光今隸

青斟尋

夏同姓國按漢北海郡有斟縣其地在今濰州東南五十里尚有斟亭京相璠云斟尋去斟亭

七過澆之國一名有過萊
州掖縣北有過鄉
戈獐之國在
崇永興鄆縣東
在夏為扈在

商為姚商時
邳商時國今淮
密須按今涇州靈臺有密
崇國陽治下邳是

定有陰
甲父單州有
颺颺叔安之國亦作
密城甲父城颺唐州湖陽是
褒褒姒之國
疑蔡州褒

信防風氏
湖州武
廩古廩國鄆州中
是康縣是
都有廩陽亭
葛南京寧陵縣有
故寧城是北去

亳城百里亳即湯始居或云許州鄆城
北三十里有葛伯城然皆指其處也

周都

周本扶風郡之地名后稷始封於此其所居之地謂之
邠公劉遷於豳豳亦作邠大王避狄去豳居岐及文王

德業光大作邑於豐而典治南國武王有天下乃居鎬
京豐在豐水之西鎬在豐水之東周地西迫戎俗自岐
之豐自豐之鎬是西遠戎而東即華也武王克商乃遷
九鼎于郊鄩至成王始定鼎于此而城之以為東都謂
之王城及三監導紂子武庚叛成王乃命周公營洛邑
遷商之頑民於此謂之成周自武王十一世至幽王為
犬戎所滅太子宜臼徙居王城謂之東周是為平王東
徙之後則以王城為周而以鎬京為宗周自平王十三

世至敬王有王子朝之難王城墮廢又遷成周成周在東河南在西又以王城為西周成周為東周故公羊曰王城者西周也由春秋後至赧王時周分為二而赧王復居王城為西周考王弟桓公之孫惠公居成周為東

周卽今武功縣釐城是也幽班固云枸邑有幽鄉按枸邑故城在今邠州三水縣東北或云三水西南三十

里有古豳城是也岐今鳳翔岐山是也豐鎬皆水名豐在今永興鄠縣東南鎬去豐二十里王城今河南縣成

周今洛陽縣

周諸侯都

魯都曲阜

魯本少昊摯居之謂之少昊之墟又大庭氏居之魯於其上作庫故謂大庭氏之庫至周

成王以周公之功而封伯禽於此其地本名魯乃作都於曲阜宋祥符中改曲阜為仙源今隸兗州齊都

薄姑遷于營邱

齊本顓帝之墟營邱今臨淄縣薄姑亦謂之蒲姑在其西北或云營邱故城在

濰州昌樂而青州博興有蒲姑故城宋都商邱

杜預云梁國睢陽縣按睢陽隋改為宋城今南京治

本陶唐氏之火正小伯之墟以其主火故為大辰之墟相土因之武王伐紂封紂子武庚於邶武庚叛成王殺之更封紂兄子微子啟於衛都朝歌及懿公為狄所滅宋以為商後故謂之商邱衛都朝歌及懿公為狄所滅

宋桓公迎衛之餘民渡河立戴公以廬於曹後齊桓公

城楚邱而居文公焉至成公又遷於帝邱

朝歌故城在衛縣西二十

二里衛縣宋熙寧省為鎮入黎陽本紂都故謂之商墟
曹亦作漕今滑州白馬是也楚邱今單州成武帝邱本
顓帝之墟故曰帝邱夏王之世昆吾氏居
之故亦謂之昆吾之墟今澶州濮陽縣

鄭都本西周

畿內之地周宣王以封母弟桓公友及幽王有犬戎之

變鄭武公遂遷于濟洛河潁之間謂之新鄭

鄭之始都謂之故鄭

今華州鄭縣是也有鄭故城在縣北新鄭今之滎陽

晉都唐謂之夏墟大名也本

堯所都謂之平陽成王封母弟叔虞於此初謂之唐其

子燹立始改為晉以有晉水出焉其地正名翼亦名絳

而平陽者是其總名及昭侯立封叔父桓叔於曲沃後

曲沃盛彊桓叔之孫武公滅翼遂有晉都至景公遷於

新田又謂新田為絳而謂平陽為故絳

唐今定州唐縣猶有唐城或云

唐城在絳州翼城西二里平陽今為絳州縣翼晉之舊都今絳州翼城是也尚有故城在縣東南曲沃今為絳州縣晉先君祖廟並在此新田一名絳今絳州絳縣是也或云絳故城在曲沃南一里景公以後並都是楚

都丹陽周成王封熊繹以子男之田蓋居於此至熊達

始盛彊僭稱王是為楚武王遷都于郢昭王為吳所滅

又遷於郢楚本名荊至成王顓始改號楚

丹陽今江陵枝江縣郢江

陵縣北十餘里有汜南城城東有小城名郢在江之南非今郢州都本郢國楚并之在襄陽宜城縣東按今襄

州南二百二十里廢樂鄉縣是其地今有郡鄉在郿水傍又云宜城西南有郿亭山至考烈王徙都壽春復命曰郿今楚州者秦周孝王封非子居於秦谷至襄公赴懷王孫心所都

幽王之難以兵助送平王故平王與之以岐豐之地列

為諸侯莊公居犬邱文公居汧渭德公遷于雍自德公

以下十八世居雍獻公遷櫟陽孝公乃遷咸陽秦谷故隴西縣

秦亭是也隴西唐末為寨宋熙寧廢為鎮入汧原今隴州故秦城尚在大邱漢槐里縣今永興軍興平縣雍

故扶風雍縣唐改曰天興今鳳翔治櫟陽咸陽今皆為縣隸永興軍吳都吳今蘇州城是虞都

虞杜預云河東大陽縣按今陝州夏縣有大陽故關而平陸縣東北六十里見有故虞城仲雍國於吳其支

子別封於此故亦謂之西吳其虞舜之後居於虞城今為縣隸南京非此虞也

虢都上陽

上陽今虢

州虢略此虢仲之封也謂之西虢而虢叔之封在鳳翔虢縣謂之南虢復有一虢居於蒙縣謂之東虢以其在

二虢皆主於上陽

曹都曹

今廣濟軍治定陶是

許都許後遷于

葉又遷于城父又遷于白羽又遷于容城

許今許州白羽一名析鄆

州浙川是或云內鄉是容城華容縣是

邾都邾

今兗州曲阜東南四十里古邾城是或云濟州任城

南二十里復有邾婁城皆即其所也曲阜今為仙源縣

莒都莒後遷鹽官故謂之

南莒

莒今為密州縣

紀都紀遷于劇

紀本在東海故贛榆縣紀城是劇在青邱臨朐縣東

壽光縣西亦名

滕都小邾遷于公邱

小邾即蕃縣及遷于公邱則故地為

小邾國隋以其為滕舊都故改蕃為滕縣今隸徐州公邱今兗州龔邱

薛仲虺之都本在

魯地奚仲遷于邳

魯莊公三十一年築臺於薛即薛舊都也及遷于邳又以邳為薛今徐州

滕縣東南五十里薛城是

州都淳于後遷華容

淳于今為密州高密華容今荆南府監利

蔡本畿內之地以為蔡叔之采邑及蔡叔逆命國除至

蔡仲始改封于汝南故以汝南為蔡及遷州來則以州

來為下蔡汝南為上蔡

今蔡州上蔡縣西南十里故蔡城即蔡國也州來即下蔡縣今

壽州治

徐都臨淮

今泗州臨淮有徐城又有偃王廟徐君墓

葛都甯

南京甯陵縣故甯城

是越都會稽

今會稽城亦謂之勾踐城越州城也

陳都宛邱

宛邱今陳州治本太昊之

墟

南燕都胙

東郡舊有燕縣隋改曰胙城本胙國也為燕所并胙城唐為縣隸滑州故燕城在胙

城東

遂都乘邱

乘邱舊為蛇邱唐省入鉅野今齊州治

譚都譚

齊州歷城縣有古譚

城

管都管

鄭州管城是

鄆都鄆

今鄭州新鄭東北三十五里有古鄆城

戴都戴

今開封封邱

任都任城

今濟州任城

宿都無鹽

無鹽故城在鄆州須城東

縣有戴城

三十里

須句都須朐遷于須昌

鄆州壽張縣西北有須朐城須昌今鄆州舒城也

顓臾都費

沂州費縣西北八里有故顓臾城

鄆都鄆

今沂州承縣東八十里故鄆城向

都向

今沂州有古向城

鄆都開陽

故開陽城在臨沂縣北十五里

蕭都蕭

徐州蕭縣

頓都南頓

今陳州南頓縣

息都新息

今蔡州新息縣

沈都平輿

平輿故城在蔡

州汝陽
縣東
項都項城
陳州項城縣東
隨都隨
今隨州
鄧都鄧

襄陽鄧城
縣界也
夔都夔
今歸州東二十里
北燕都薊
幽州治
邢都

襄國
襄國隋改曰龍
梁都新里
同州夏陽有新里城
韓

都韓城
故城在今同州韓
魏都魏城遷于大梁
今陝州平陸有

魏城大梁
即開封
趙都趙城遷于平棘
趙城今隸晉州
邯都邯

武王封季載於此
今濮州
部都部
部有南北今單州
應

都葉
汝州葉縣
蔣都期思
期思故城在光州
申都申
今信

陽
軍
呂都呂
蔡州城蔡
焦都焦
陝州東北百
耿都耿
河府龍

門縣南十二里故耿城是**霍都**今晉州有霍邑**揚都**揚都揚晉州洪洞縣東南十八里有故揚城

冀都今河中有冀亭**芮都**杜預云馮翊臨晉縣有芮鄉按臨晉故城在今同州朝邑

西南二里**賈都**賈都賈同州蒲城縣有賈城**荀都**荀城在絳州平西十五里**黎都**黎

今潞州黎城縣有黎侯故城**邛都**京相璠云野王縣西北三十里有故邛城野王隋改曰河內今

懷州治**周夷國都**

周夷國都

戎都杜預云陳留濟陽縣東南有戎城又有戎州是**夷都**杜預

城陽莊武縣所治夷安縣是也**介都**介東邑國今密州諸城縣東北一百一十里有黔陬故城

根牟都安邱

今密州安邱

萊都黃

登州黃縣東南二十五里有故黃城即萊子國

右東夷

百濮都濮

今江陵建寧縣是

舒都舒

今廬州舒城

羣舒都龍舒

今廬江

有龍舒

允姓之戎本居瓜州秦晉誘而致之伊川

瓜州今在極西

瓜沙之地伊川故陸渾縣其地在河南伊陽縣南

伊拒泉臯伊洛之戎

杜預云伊闕縣

北有泉亭

蠻氏都麻解

杜預云河南新城縣東南有蠻氏城俗以為麻解城蠻麻聲近按麻解縣

亦謂之蠻王城今在汝州西南近伊闕

庸都上庸

房州竹山縣西二百五十里有上庸城

廬

戎都盧

今襄州中廬

巴都江州

江州故縣名隋改為江津隸渝州

右南蠻

狄都狄亦謂之翟其別都有箕

狄在慈州箕城在遼州榆社東南三十里白

狄都西河

白狄與秦同州今坊鄜延綏間皆古白狄之地

鮮虞都鮮虞

白狄之別種今

定州安喜舊鮮虞縣

肥都昔陽

肥即白狄遷于昔陽故城在今平定軍樂平縣東五十里

鼓都

鼓城

白狄別種今祁州鼓城縣

驪戎都臨潼

今永興臨潼縣東二十四里有驪戎故城

右西戎

赤狄都洛

今洛州之地

潞都潞

今潞州是

東山臯落氏都臯落

今絳

州垣縣西北六十里有臯落城服虔云世謂之哥臺城蓋聲相近

山戎都薊

北狄也號無終子今

薊州治漁陽所以蔽北燕之路

唐咎如甲氏留吁鐸辰皆赤狄別種散

居河北鄭瞞在夏為防風氏商為汪芒氏皆長狄國也

右北狄

秦都

秦都已見本卷周諸侯都中

兩漢都

前漢都長安謂之西都後漢都洛陽謂之東都光武又

以南陽為別都謂之南都至建安元年曹操挾獻帝遷

許長安宋為永興軍治
南陽鄧州許潁昌府

三國都

魏略云魏以長安譙許昌鄴洛陽為五都洛陽其京室也吳志云吳都鄂後遷建業故改鄂為武昌改秣陵為建業後避晉愍帝諱故又改為建康蜀志云蜀都成都

譙今亳州許昌今潁昌府鄴相州鄂即鄂州建業今建康府成都益州也

兩晉都

晉都洛陽仍魏舊也東晉都建業本吳都也

十六國都

後魏雖共起其後奄有中
原故不在十六國之數

張軌都敦煌謂之前涼

沙州

呂光都姑臧謂之後涼

涼州

李暠都酒泉謂之西涼

肅州

秃髮烏孤都張掖謂之南涼

蘭州與乞伏國仁
分據定樂在其東

沮渠蒙遜都張掖謂之北涼

甘州

慕容皝初都和龍後徙薊又徙鄴謂之前燕

和龍唐柳
城宋時大

遼黃龍府薊

幽州鄴相州

慕容垂都中山謂之後燕

今中山府

慕容德都廣固謂之南燕

青州

馮跋都和龍謂之北燕

劉淵都平陽謂之前趙

晉州

苻堅都長安謂之前秦

姚萇都長安謂之後秦

乞伏國仁都定樂後遷金城謂之西秦

定樂蘭州東境金城河州

赫連勃勃都統萬謂之夏

朔方

宋齊梁陳都

宋因晉舊都建業齊因宋梁因齊改號不改都梁有太清之禍建康殘毀元帝興復即位于江陵魏人滅之陳

復都建業

江陵今
荆南府

後魏都

魏拓跋氏甚微至道武帝諱珪始盛彊晉太元間作都于代六世孝文帝改姓元氏遷于洛陽後世微弱孝武帝為高歡所逼出居長安依宇文泰是為西魏高歡立

孝靜帝遷都于鄴是為東魏高氏繼東魏居鄴謂之北齊宇文氏繼西魏居長安謂之後周

隋都

文帝繼周即都長安開皇二年帝以長安故城漢來舊邑年代既久凋弊實多又制度狹小不稱皇居乃作新都於龍首山在漢城東南

屬杜縣本後周之京兆郡萬年縣界也

南直終

南山子午谷北據渭水東臨灞澹西枕龍首謂之大興

城

文帝初封大興公故登極以後其命城縣門殿池及寺皆以大興焉

四夷都

朝鮮都王險

漢樂浪郡

濊都濊在高句麗之北

漢滄海郡

三韓皆都帶方郡之東大海中東西以海為限南與倭接北與樂浪方可四千里有三種曰馬韓辰韓弁韓復有一種曰弁辰其後馬韓悉王三韓之地都目支國

百濟都居拔城亦曰固麻城

晉時據遼東晉平二郡在柰城北平之間

新羅都新羅在百濟東南五百餘里亦在高句麗東南

兼有漢時樂浪郡之地

倭初都帶方東南大海中後都邪馬臺邪馬臺去遼東二千里在百濟新羅東南

夫餘都夫餘城在元菟北千里南與高句麗東與挹婁西與鮮卑接北有弱水地方二千里

高句麗初都紇升骨城後世遷於丸都山下自東晉以後移都於平壤城又有別都曰國內城曰漢城號為三

京平壤即漢樂浪郡王險城亦曰長安城東西六里隨山屈曲南臨涓水在遼東南千餘里城內惟積倉儲

器械賊至方入固
守王別宅於其側

東沃沮都高句麗西北在蓋馬大山之東

蓋馬縣名屬元菟郡

東

濱大海北與挹婁扶餘南與濊貊接又有北沃沮一名

置溝婁去南沃沮八百餘里亦與挹婁接

挹婁即古肅慎國都不咸山在夫餘東北千餘里東濱

大海南與北沃沮接不知其北所極

勿吉

亦曰
靺鞨

亦古肅慎氏國其都在高句麗之北自和龍

北二百餘里有善玉山山北行十三日至祁黎山又北

行七日至洛瓌水水廣里餘又北行十五里至大兵魯水又東北行十八日至其都

扶桑都在大漢國東二萬餘里地在中國之東土多扶桑木故以為名

文身都倭國東北千餘里

流求都海島之中當建安郡東水行五日而至

閩越初都東冶即長樂郡也後都東甌即永嘉郡也

或云

建州建州今有甌寧縣

右東夷

廩君都夷城其後世散處巴郡南郡謂之南郡巴郡蠻
板楯蠻始居巴中其後世僭侯稱王屯據三峽為後周
所滅

獠始出漢中達于邛笮其後侵暴梁益

南平獠居南平其地東距智州南屬渝州西接南州北
接涪州

東謝蠻居黔州西三百里南距守宮獠西連夷子地方

千里

西趙蠻居東謝之南其地東至夷子西至昆明南至西
洱河南北十八日行東西二十三日行

牂柯蠻世為本土牧守唐以其地為牂州

兗州蠻與牂柯蠻接唐以其地為兗州牂柯兗州皆黔
中屬州也

西爨蠻晉時據南寧郡其地延袤二千餘里隋以其地
置恭州協州昆州未幾復叛唐兵擊之開置青蛉弄棟

為縣

昆彌蠻在西爨之西以西洱河為境

尾濮居興古郡西南千五百里徼外

興古今雲南郡地

又有木

綿濮文面濮赤口濮黑赭濮皆在永昌西南與尾濮接
松外諸蠻散處夜郎滇池以西凡數十姓

右南蠻

夜郎在蜀徼外近牂柯其江水趨番禺城下

滇在夜郎之西即漢益州郡也蜀改益州郡為建寧分

建寧永昌為雲南郡又分建寧牂柯為興古郡滇即今之雲南也

邛都即漢越雋郡之地

笮都即漢沈黎郡之地

丹駝即漢汶山郡之地

哀牢即永昌郡之地

附國在蜀郡西北二千餘里即漢之西南夷也

右西南夷

南粵都南海今廣州也

右嶺南夷

黃支在合浦日南之南三萬里

哥羅在槃槃東南亦曰哥羅富沙國

林邑本漢日南郡象林縣古越裳界也在交趾南海行
三千里

扶南在日南郡之南海西大島中去日南可七千里在
林邑西南三千餘里去海五百里

頓遜去扶南可三千餘里其國之東界通交州其西界接天竺安息其所都在海崎山上地方千里城去海十里羈屬扶南

毗騫居大海洲中去扶南八千里

于陀利在南海洲上史不言道里方向獨稱其俗與林邑扶南略同當是與扶南林邑近也

狼牙脩在南海中其界東西三十日行南北二十日行北去廣州二萬四千里

婆利在廣州東南海中洲上自交趾浮海南過赤土丹
丹國乃至其國去廣州二月日行國界東西五十日行
南北二十日行

槃槃在南海大洲中北與林邑隔小海自交州船行四
十日至其國

赤土扶南之別種也在南海中直崖州之南水行百餘
日達其國

真臘都伊奢那城在林邑西南本扶南之屬國也去日

南郡舟行六十日而至

羅刹在婆利之南

投和在真臘之南自廣州西南水行百日至其國

丹丹在羅摩羅國西北振州東南

振州與珠崖同島上

遘斗都昆拘利比嵩自扶南渡金隣大灣南行三千里

有此四國

杜薄在扶南東漲海中直渡海數十日至其國

薄刺在拘利南海灣中

勃焚在南海洲中

火山在杜薄東五千里

無論在扶南西二千餘里

右海南夷

羌散處三河之間

月氏胡居湟中

氏散處廣漠之西其後保仇池竊據秦梁之地

葱訖羌自婁羌西至葱嶺數千里皆其地也

吐谷渾在益州西北都伏俟城在青海西十五更其地東西三千里南北千餘里

乙弗敵在吐谷渾北國有屈海海周迴四千餘里乙弗敵之西有契翰國又有可蘭國可蘭西南一千五百里隔大嶺又度四十里海有女王國

宕昌羌居今宕州其地自仇池以西東西千里滯水以南南北八百里

鄧至羌世居白水自亭街以東武平以西汶嶺以北宕

昌以南皆其地也

党項羌居古析支之地其地東接臨洮西平西拒葉護南凭春桑迷桑等羌北連吐谷渾南北數千里

白蘭羌居白蘭其地東北接吐谷渾西至叱利模徒南界鄒鄂

吐蕃在吐谷渾西南其先居跋布川或居邏娑川後徙都祥柯西疋播城唐初大盛其地東與松茂舊接南極婆羅門西取四鎮北抵突厥幅員萬里

右西羌

姑羌治姑羌城去長安六千三百里西與且末接

鄯善本名樓蘭王治杆泥城去長安六千一百里西北至車師千八百九十里

且末王治且末城去長安六千八百二十里北接尉犂
丁零東與白提西與波斯精絕接南至小宛可三日行
小宛王治杆零城去長安七千二百一十里東與姑羌
接

精絕王治精絕城去長安八千八百二十里南至戎盧
四日行西通扞彌四百六十里

戎盧王治卑品城去長安八千三百里東與小宛南與
姑羌西與渠勒接

扞彌王治扞彌城去長安九千二百八十里南與渠勒
東北與龜茲西北與姑墨接西通于闐三百九十里

渠勒王治鞬都城去長安九千九百五十里東與戎盧
西與姑羌北與扞彌接

于闐王治西城去長安九千六百七十里南與婁羌接
北與姑墨接西通皮山三百八十里

皮山王治皮山城去長安萬五千里西南至烏秣千三
百四十里南與天竺接北至姑墨千四百五十里西南
當罽賓烏弋山離西北通莎車

烏秣王治烏秣城去長安九千九百五十里北與于合
蒲犁西與難兜接

西夜亦號于合王治呼捷谷去長安萬二百五十里東

與皮山西南與烏秣北與莎車西與蒲犁接

蒲犁王治蒲犁谷去長安九千五百五十里東至莎車
五百四十里北至疏勒五百五十里南與西夜子合接
西至無雷五百四十里

依耐王治依耐城去長安萬一百五十里東北至莎車
五百四十里至無雷五百四十里北至疏勒六百五十
里南與子合接

無雷王治盧城去長安九千九百五十里南至蒲犁五

百四十里南與烏托北與捐毒接

難兜王治難兜城去長安萬一百五十里西至無雷三百四十里西南至屬賓三百三十里南與婁羌北與休循西與大月氏接

屬賓王治循鮮城去長安萬二千二百里東至烏托二千二百五十里東北至難兜九日行西北與大月氏西南與烏弋山離接

烏弋山離去長安萬二千二百里東與屬賓北與撲挑

西與犁鞞條支接行可百餘日乃到

條支去陽關二萬一千一百里在葱嶺之西城居山上
周回四十餘里

安息王治番兜城去長安萬一千六百里在葱嶺之西
大宛之西可數千里北與康居東與烏弋山離西與條
支接

大月氏王治監氏城去長安萬一千六百里西至安息
四十九日行南與罽賓接

小月氏王治富樓城在波路西南去代萬六千六百里
康居王冬治樂越匿地到卑闐城去長安萬二千三百
里至越匿地馬行七日至王夏所居蕃內九千一百四
十里

米國都那密水西舊康居之地西北去蘇對那國五百
里西南去史國二百里東去瓜州六千四百里

史國都獨莫水南十里舊康居之地北去康國二百四
十里南去吐火羅五百里西去那色波國二百里北去

米國二百里東去瓜州六千五百里

曹國都那密水南數里舊康居之地東南去康國百里
西去何國百五十里東去瓜州六千六百里

何國都那密水南數里舊康居地東去曹國百五十里
西去小安國三百里東去瓜州六千七百五十里

烏那遏國都烏澹水西舊安息之地東北去安北四百
里西北去穆國二百餘里東去瓜州七千五百里

穆國都烏澹河之西亦安息之故地與烏那遏鄰

大宛王治貴山城去長安萬二千五百五十里北至康
居卑闐城千五百一十里西南至大月氏六百九十里
北與康居南與大月氏接

桃槐國去長安萬一千八百里

休循王治飛鳥谷在葱嶺西去長安萬二百一十里東
至捐毒衍敦谷二百六十里西北至大宛國九百二十
里西至大月氏千六百一十里

天竺即捐毒也王治衍敦谷去長安九千八百六十里

西北至大宛千三百里北與烏孫接

莎車王治莎車城去長安九千九百五十里西至疏勒
五百六十里西南至蒲犁七百四十里

疏勒王治疏勒城去長安九千三百五十里南至莎車
五百六十里西當大月氏大宛康居道

尉頭王治尉頭谷去長安八千六百五十里南與疏勒
接西至捐毒千三百一十四里

烏孫大昆彌治赤谷城去長安八千九百里西至康居

蕃內地五千里

姑墨王治南城去長安八千一百五十里南至闐馬行十五日北與烏孫接東通龜茲六百七十里

溫宿王治溫宿城去長安八千三百五十里西至尉頭三百里北至烏孫赤谷城六百一十里東通姑墨二百七十里

龜茲王治延城去長安七千四百八十里南與精絕東南與耳末西南與犂彌北與烏孫西與姑墨接

尉犁王治尉犁城去長安六千七百五十里南與鄯善
且未接

危須王治危須城去長安七千二百九十里西至焉耆
百里

焉耆王治員渠城去長安七千三百里南去尉犁百里
北與烏孫接東去交河城九百里西去龜茲九百里

烏貪訾離王治于婁谷去長安萬二百三十里東與單
桓南與且彌西與烏孫接

卑陸王治天山東接乾當谷去長安八千六百八十里
卑陸後國王治番渠類谷去長安八千七百一十里東
與郁立師北與匈奴西與劫國南與車師接

郁立師王治內咄谷去長安八千八百三十里東與車
師後城長西與卑陸北與匈奴接

單桓王治單桓城去長安八千八百七十里

蒲類王治天山西疏榆谷去長安八千三百六十里

蒲類後國去長安八千六百三十里

移支王居蒲類地

西且彌王治天山東于大谷去長安八千六百七十里
東且彌王治天山東兌虛谷去長安八千二百五十里
劫國王治天山東丹渠谷去長安八千五百七十里
狐胡王治車師柳谷去長安八千二百里西至焉耆七
百七十里

山國去長安七千一百七十里西至尉犁二百四十里
西北至焉耆百六十里西至危須二百六十里東南與

鄯善且未接

車師前王治交河城去長安八千一百五十里

車師後王治務塗去長安八千九百五十里北與匈奴

接

又有車師後城長國

滑國與車師鄰接車師之別種也

滑旁有小國曰阿跋檀周古柯胡密丹等

國又有白題國在滑國東去滑六日行西極波斯

車離居沙奇城在天竺東三千餘里

高附居大月氏西南

大秦居大海之西亦云海西國

奄蔡去陽關八千餘里西與大秦東南二千里與康居

接

後魏時所為粟特國國人云其國見在葱嶺之西故奄蔡地也一名溫那沙居於大澤在康居西北去代

一萬六千里北距安息五千里

小人居大秦之南

軒渠居三童東北

三童居軒渠西南

澤散治北海中北至驢分水行半歲與安息城郭相近

驢分其治去大秦都二千里

堅昆居康居西

呼得居葱嶺北烏孫西北康居東北丁令在康居北已
上三國堅昆居中俱去匈奴單于庭安習水七千里南
至車師六國五千里西南去康居界二千里西去康居
王治所八千里

短人在康居西北

師子居天竺旁在西海中

噉噉居于闐西都烏澣水南二百餘里去長安一萬一
百里王都號拔底延蓋王舍城也

波斯居達曷水之西都宿利城去代二萬四千二百二
十八里西去海數百里東南去穆國四千餘里西至拂
蘇四千五百里即條支之故地

伏盧尼都伏盧尼城在波斯國北去代二萬七千三百
二十里

悅般在烏孫西北

朱俱波居于闐西千餘里西至渴槃陀南至女國三千里北至疏勒九百里南至葱嶺二百里

渴槃陀治葱嶺東在朱俱波西西至護密國南至縣度山北至疏勒國界西北至判汗國

鉢和在渴槃陀西有二道一道西行向嚙噠一道西南趨烏菴

波知在鉢和西南

賒彌在波知之南山

烏菴在賒彌南北至葱嶺南至天竺波羅門

乾陀在烏菴西

阿鈎羗居莎車西南去代一萬三千里

副貨去代一萬七千里東至阿富汗且國西至沒誰國
中間相去一千里北至奇沙國相去一千五百里

疊伏羅去代三萬一千里

拔豆去代五萬一千里東至多勿當國西至旃那國中
間相去七百五十里南至罽陵迦國北至弗那伏且國

中間相去九百里

者至拔都者至拔城在疏勒西去代一萬一千六百二十里

迷密在者至拔西去代一萬二千一百里

悉萬斤都悉萬斤城在迷密西去代一萬二千七百二十里

怛密在悉萬斤西去代二萬二千八百二十八里

石國居於藥殺水都柘折城東與北至西突厥界西至

波臘國界西南康居界南至率都沙那國界南去撥汗
六百里東南去瓜州六千里

女國在葱嶺南

撥汗都葱嶺西五百餘里東去疏勒千里西去蘇對沙
那國五百里北去石國五百里東北去突厥可二千餘
里東去瓜州五千里

吐火羅治薄提城去代萬二千里東至范陽國西至悉
萬斤中間相去二千里北至波斯國中間相去一萬里

劫國居葱嶺中西南與賒彌國界接西北至挹怛國去
長安萬二千里

陀羅伊羅居烏荼國北大雪山坡上

越底延治卒頭河北南至婆羅門國三千里西至賒彌
國千餘里北至瓜州五千四百里

大食居波斯之西

右西域

匈奴都單于庭直代雲中後分而為二北單于居單于

庭南單于居西河美稷漢建安末魏武始分其衆為五部魏立五部都尉以統之其左部都尉居太原故慈氏縣右部都尉居祈南部都尉居蒲子北部都尉居新興中部都尉居太陵至于晉初塞外匈奴盡向化由是與晉人雜處居平陽西河太原新興樂平諸郡靡不有焉烏桓都烏桓山漢武帝徙於上谷漁陽右北平遼東五郡塞外

鮮卑都鮮卑山在柳城郡界

軻比能小種鮮卑也居遼西右北平漁陽塞外

宇文莫槐居遼東塞外

徒河段居遼西

蠕蠕都弱落水其常所會庭則敦煌張掖之北

高車都鹿渾海西北百餘里

稽胡散居離石以西安定以東

突厥世居金山後分為二其一曰沙鉢略可汗居都斤

山又南徙于白道川

西突厥居烏孫之故地南至突厥西至雷菑海南至疏勒北至瀚海在長安西北七千里

鐵勒種類最多居西海之東依山據谷

庫莫奚亦謂之奚都饒樂水即鮮卑故地

契丹居松漠之間後徙遼西正北二百里依託統臣水而居亦鮮卑故地其後都于和龍即唐之柳城也

統臣水一

作統
臨水

室韋居勿吉北千里去洛陽六千里

地豆于居室韋西千餘里

烏洛侯在地豆于北去代都四千五百餘里

驅度寐在室韋北

雷與靺鞨鄰治黃水北亦鮮卑故地

拔悉彌在北庭北海南結骨東南依山散居去敦煌九千餘里

右北狄

通志卷四十一

欽定四庫全書

史部
通志卷四十二

詳校官侍讀_臣陳萬青

編修_臣裴謙履勘

覆校官助教_臣金學詩

校對官典簿_臣劉光第

謄錄監生_臣王寶唐

欽定四庫全書

通志卷四十二

宋右廸功郎鄭樵漁仲撰

禮略第一

吉禮上

郊天 太雩 明堂 朝日夕月 大禘

臘

靈星

風師雨師及諸星等祠

方丘

神州后土附

社稷

山川 籍田 先蠶

郊天

有虞氏禘黃帝

爾雅釋天云禘大祭也虞氏冬至大祭天於圓丘以黃帝配坐

而郊嚳

夏正之月祭感生帝於南郊以嚳配焉

夏后氏禘黃帝而郊鯀商人禘嚳

而郊冥周制大司樂云冬至祀天於地上之圓丘又

大宗伯職曰以禋祀昊天上帝禮神之玉以蒼璧其牲

及幣各隨玉色牲用一犢幣用繒長一丈八尺

鄭康成注云曾

子問云制幣長丈八鄭約廵狩禮文也餘用幣長短皆准此

王服大裘其冕無旒尸

服亦然乘玉輅錫繁纓十有再就建大常十有二旒以

祀罇及菹醢之器以瓦爵以匏藉神之席以藁秸及蒲

翦而不納

藁秸藉天神蒲越藉配帝

配以帝饗其樂大司樂云凡樂

圜鍾為宮黃鍾為角太簇為徵姑洗為羽鼙鼓鼙鼗孤

竹之管雲和之琴瑟雲門之舞冬至於地上之圓丘

奏之其感生帝大傳曰禮不王不禘王者禘其祖之所

自出以其祖配之

王者先祖皆感太微五帝之精以生其神名鄭康成據春秋緯說蒼則靈

威仰赤則赤熛怒黃則含樞紐白則白招拒黑則叶光紀皆用歲之正月郊祭之蓋特尊焉孝經云郊祀后稷以配天配靈威仰也宗祀文王於明堂以配上帝汎配上帝也

因以祈穀其壇名泰壇

在國南五十里禮坤之玉用四珪有邸尺有二寸牲用

騂犢青幣配以稷其配帝牲亦用騂犢其樂大司樂云

乃奏黃鍾歌大呂舞雲門以祀天神

天神謂五帝及日月星辰王者又各

以夏正月起其所受命之帝於南郊尊之也

日用辛

按禮記及春秋魯郊於建子月用辛

又王

者必五時迎氣者奉承天道從時訓人之義故月令於

四立日及季夏土德王日各迎其王氣之神於其郊

月令

云立春之日天子親率公卿諸侯大夫以迎春氣於東郊餘四氣皆然若以祖之所自出即禘祭靈威仰於南郊一神而已若迎王氣之神即五神同祀之

其配祭以五人帝春以太皞夏

以炎帝季夏以黃帝秋以少昊冬以顓帝其壇位各於
當方之郊去國五十里內曰近郊為兆位於中築方壇
亦曰太壇而祭之禮神之玉按大宗伯云青珪禮東方
赤璋禮南方黃琮禮地則中央也白琥禮西方元璜禮
北方牲用犢及幣各隨玉色樂與感帝同秦始皇既即
位以昔文公出獵獲黑龍此其水德之瑞用十月為歲
首色尚黑音尚大呂東游海上禮祀八神二世尊雍四
時上帝

名其祭處
曰時也

春歲祠禱因泮凍秋涸凍冬塞祠五

月嘗駒及四仲之月祠每時用駒四疋木寓龍一駒木
寓車馬一駒各如其帝色黃犢與羔各四珪幣各有數
皆生瘞埋無俎豆之具三年一郊常以十月上宿郊見
通舉火拜於咸陽之旁而衣尚白其用如常漢高帝立
二年冬敗項籍還入關問秦時上帝祠何帝也對曰四
帝有白青黃赤高帝曰乃待我而具五色遂立黑帝祠
名北時有司進祠帝不親往悉召故秦祀官復置太祝
太宰皆如其故儀後四年詔御史令九天巫祠九天皆

以歲時祠宮中文帝即位詔有司增雍五時路車各一
乘駕被具魯人公孫臣上書曰始皇以水德則漢當土
德其應黃龍見宜改正朔易服色尚黃明年黃龍見成
紀拜公孫臣為博士申明土德改歷服色事有司曰古
者天子夏親祠上帝於郊故曰郊夏四月詔郊祀上帝
始幸雍郊見五時祠衣皆尚赤趙人新垣平上言長安
東北有神氣成五采若人冠冕焉宜祠上帝於是作渭
陽五帝廟明年四月帝親郊見五帝廟燿火舉若光屬

天於是貴平至上大夫文帝出長門亭名若見五人於道

北因其直立五帝壇人有告平詐偽遂誅平後渭陽長門五帝使祠官領以時致禮不親往焉武帝即位初至雍郊見五時後常三歲一郊亳人謬忌曰天神貴者太一太一佐曰五帝古者天子以春秋祭太一於東南郊日一太牢凡七祭為壇開八通鬼道於是令太祝立太一之祠於長安城東南郊常奉祠如忌方未幾又祠天一自此方士之言興而迂怪之祠紛然起矣或以祀天

為名其實非郊天之事也宣帝神爵元年正月始幸甘泉郊見泰畤修武帝故事三年幸雍祠五畤明年春幸河東祠后土然未有定制元帝即位始定舊儀間歲正月一幸甘泉郊泰畤又東至河東祠后土西至雍祠五畤凡五奉泰畤后土之祠亦施恩澤時所過毋出田租賜百戶牛酒或賜爵赦罪人成帝初即位丞相匡衡等奏言先王祭天於南郊就陽之義也瘞地於北郊即陰之象也往者孝武居甘泉宮即於雲陽立泰畤祭於宮

南今常幸長安郊見皇天反北之太陰祠后土反東之少陽未合承天之意於是徙甘泉泰畤置於長安又言今雍鄜密上下時本秦氏各以其意所立非禮所載不宜復修遂廢雍鄜密上下時九天太一天一八神之屬并餘淫祀陳寶等祠所不應禮者四百七十五所皆罷初罷甘泉泰畤作南郊日大風壞甘泉竹宮折拔時中木十圍以上者百餘天子問劉向向曰家人尚不欲絕種祠況於國乎且甘泉汾陰及雍五畤始立皆有神祇

感應然後營之誠未易動帝意恨之後以無繼嗣遂復甘泉泰畤及雍五畤如故天子親郊禮如前又復長安雍祠明著者半後成帝崩皇太后詔復南北郊長安如故以順帝意哀帝立寢疾博召方士復甘泉泰畤祀如故遣有司行事而禮祠焉平帝立王莽奏宜如建始所行丞相匡衡等議復長安南北郊祀如故莽又頗改其祭禮後漢建武元年光武即位為壇營於鄩之陽祭告天地采用前漢元始中郊祭故事六宗羣神從祀未以

祖配天地共犢餘牲尚約二年正月制郊兆於雒陽城南七里依鄩故事為圓壇八陛中又為重壇天地位其上皆南面西上其外壇上為五帝位青帝位在甲寅赤帝位在丙巳黃帝位在丁未白帝位在庚申黑帝位在壬亥其外為壇重營皆紫以象紫宮有四通道以為門日月在中營內南道日在東月在西北斗在北道之西皆別位不在羣神列中八陛陛五十八畝五帝陛郭帝七十二畝中營四門門五十四神外營四門門百八神

皆背營內嚮中營四門門封神四外營四門門封神四
凡千五百一十四神至七年五月詔三公曰漢當郊堯
其與羣臣議時御史杜林等上疏以為漢起不緣堯與
商周異宜從舊制以高帝配從之隴蜀平後乃增廣郊
祀高皇帝配食位在中壇上西面北上天地高皇帝黃
帝犢各一四方帝共用犢二日月北斗共牛一四營羣
神共牛四樂奏青陽朱明西皓元冥及雲翹育命舞中
營四門門用席十八外營四門門用席三十六皆莞簟

率一席三神日月北斗無陸郭醊既送神燎俎實于壇
南已地明帝即位永平二年以月令有五郊迎氣因采
元始故事兆五郊于雒陽四方中兆在未壇皆三尺階
無等立春日迎春東郊祭青帝勾芒立夏日迎夏南郊
祭赤帝祝融先立秋十八日迎黃靈于中兆祭黃帝后
土立秋日迎秋西郊祭白帝蓐收立冬日迎冬北郊祭
黑帝元冥車旗服飾各從方色魏文帝南巡在潁陰有
司為壇於繁陽故城庚午登壇受紱降壇視燎成禮未

有祖配明帝即位太和元年正月丁未郊祀武帝以配
天宗祀文帝於明堂以配上帝至景初元年十月乙卯
始營洛陽南委粟山為圓丘詔曰曹氏世系出自有虞
令祀圓丘以始祖帝舜配號圓丘曰皇皇帝天郊所祭
曰皇天之神以太祖武皇帝配十一月壬子冬至始祀
皇皇帝天於圓丘以始祖帝舜配自正始以後終魏代
不復郊祀

孫權初稱尊號於武昌祭南郊告天用元牡
後自以居非土中不修設末年南郊追上父

堅尊號為吳始祖以配天後三嗣主終吳代不郊祀劉
備章武元年即位設壇於成都武擔山南用元牡二年

十月詔丞相諸葛亮營南北郊于成都府

晉武帝南郊燎告未有祖配泰始

二年詔定郊祀南郊宜除五帝之座五郊同稱昊天

帝各設一座而已

時羣臣議五帝即天也隨時王氣而設號耳名雖有五其實一神南郊宜

除五帝座五郊同稱昊天從之

二月丁丑郊以宣皇帝配十一月有司

奏古者丘郊不異宜井圓方二丘更修壇兆二至合祀

是月庚寅冬至帝親祀圓丘於南郊是後圓丘方澤不

別立太康三年正月帝親郊祀皇太子皇子悉侍祠十

年十月詔曰孝經郊祀后稷以配天宗祀文王於明堂

以配上帝往者衆議除明堂五帝位考之於禮不正詩序曰文武之功起於后稷故推以配天焉宣帝以神武創業既以配天復以先帝配天可乎遂復南郊五帝位東晉元帝即位於建康議立南郊於巳地太常賀循定制多依漢及晉初之儀三月辛卯帝親郊祀饗如泰始故事成帝咸和八年正月郊天則五帝之佐日月五星二十八宿文昌北斗三台司命軒轅后土太一天一太微勾陳北極雨師雷電司空風伯老人凡六十二神

從祀康帝建元元年正月辛未南郊帝親奉焉

祝文稱
嗣天子

臣某安帝元興四年應郊帝蒙塵于江陵朝議宜依周禮

宗伯攝事尚書右丞王納之曰郊天極尊非天子不祀

無使皇輿不得親奉時從納之議郊廟牲幣璧玉之色

雖有成文秦世多以駢駒漢則但云犢江左南北郊用

元牲明堂廟社用赤牲宋永初二年正月上辛帝親郊

祀三年九月司空羨之等奏高祖武皇宜配天郊詔可

孝武大明二年正月有司奏今月六日南郊輿駕親奉

至時或雨遂遷日有司行事

有司奏按魏代郊天值雨更用後辛晉代顧和亦云

更擇吉日南郊自魏已來多使三公行事

大明三年移郊兆於秣陵牛頭山

西在宮之午地

徐爰曰禮記燔柴於泰壇祭天也迎日於南郊就陽位也晉代過江郊悉在北

或南出道狹多於巳地宋因而弗改今聖圖重造舊章畢新宜移郊正午以定天位也

大明五年

九月甲子有司奏郊祭用三牛孝武崩廢帝以郊舊地

為吉祥移置本處齊高帝受禪明年正月上辛有事南

郊而無配犧牲之色因晉宋故事建元四年武帝繼位

明年正月祀南郊自茲以後間歲而祀永明元年立春

前郊祀郊壇圓兆外內起瓦屋形制宏壯梁武帝即位

南郊為圓壇在國之南

壇高二丈七尺上徑十一丈下徑十八丈其外再墻四門

常

與北郊間歲正月皇帝致齋於萬壽殿上辛行事

吳操之云

啟蟄而郊郊在立春後何佟之云今之郊祀是報昔歲之功而祈今年之福故取歲首上辛不拘立春前後周之冬至圓丘大報天也夏正又郊以祈農事故有啟蟄之說帝曰圓丘自是祭天先農即是祈穀祭昊天宜在冬至祈穀則必須啟蟄

用特牛一祀天皇帝於壇上以皇考太

祖文帝配五帝天文從祀禮以蒼璧制幣除鬯裸

佟之啟按

鬯者盛以六彝覆以畫罍備其文飾施之宗廟今郊祀有裸恐乖尚質宜革之帝依此行香用沉器

以陶匏素俎席用藁秸皇帝一獻再拜受福

帝以一獻為質三獻

為文自是天地之祭皆一獻為皇
帝受福明上靈降祚臣下不敢同

太尉設燎壇於丙地

禮畢器席有司燒埋之五年迎五帝以始祖配十七年

帝以威仰魄寶俱是天神於壇則尊於下則卑且南郊

所祭天皇其五帝別有明堂之祀不煩重設又郊祀二

十八宿而無十二辰於義闕然南郊可除五帝祀加十

二辰與二十八宿各於其方為壇陳武帝永定元年受

禪修圓丘

壇高二丈二尺
五寸廣一十丈

柴燎告天明年因以正月上

辛有事南郊以皇考德皇帝配除十二辰風師雨師及五帝位間歲而祀文帝天嘉中改以高祖配復三獻之禮宣帝即位以郊壇卑下更增廣之後魏道武帝即位二年正月親祀上帝於南郊以始祖神元皇帝配壇通四陞壇埒三重天位在上南面神元西面五帝以下天文從食席用藁秸玉以四珪幣用束帛牲用黝犢後冬至祭上帝於圓丘牲幣並同天賜二年四月復祀天于西郊為方壇東為二陞土陞無等周垣四門門各依方

色為名置木主七於壇上牲用白犢黃駒白羊各一祭
之日帝御大駕至郊所立青門內近南西面朝臣及夫
人咸位於青門外后率六宮從黑門入列於青門內近
北並西面廩犧令掌牲陳於壇前女巫執鼓立於陞東
西面選帝七族子弟七人執酒在巫南西面北上女巫
陞壇搖鼓帝拜后肅拜內外百官拜祀訖乃殺牲七執
酒七人西向以酒灑天神主復拜如此者三禮畢而反
自後歲一祭孝文帝太和十二年親築圓丘於南郊北

齊每三年一祭以正月上辛禘祀昊天上帝於圓丘以高祖神武帝配五精帝天文等從祀禮以蒼璧東帛蒼牲九皇帝初獻太尉亞獻光祿卿終獻司徒獻五帝司空獻日月五星二十八宿太常丞以下薦衆星後諸儒定禮圓丘改以冬至祀之南郊則歲一祀以正月上辛為壇於國南祀所感帝靈威仰以高祖神武皇帝配用四珪幣如方色其上帝及配帝各用騂特牲一燎同圓丘後周憲章多依周制正月上辛祀昊天上帝於圓丘

以其先炎帝神農氏配昊天上帝於其上五方上帝天文並從祀又祀所感帝靈威仰於南郊以始祖獻侯莫那配用牲各以方色皇帝乘蒼輅戴元冕備大駕而行從祭者皆蒼服隋文帝受命再歲冬至日祀昊天上帝於圓丘以太祖武元皇帝配五方上帝天文並從祀其牲上帝配帝用蒼犢各一五帝日月用方色犢各一五星以下羊豕各九孟春上辛祠感帝赤燁怒於南郊亦以太祖武元帝配其禮四珪有邸牲用騂犢二煬帝大

業元年孟春祀感帝改以高祖文帝配餘並仍舊十年冬至祀圓丘帝不齋于次詰朝備法駕至便行禮是日

大風帝獨獻上帝三公分獻五帝禮畢御馬疾驅而歸

唐武德初定令每歲冬至祀昊天上帝於圓丘以景帝

配五方上帝天文皆從祀

日月內官中官外官及衆星皆從祀

上帝及配

帝用蒼犢各一五方帝及日月用方色犢各一內官以

下加羊豕各九孟春辛日祈穀祀感帝于南郊以元帝

配牲用蒼犢二武德貞觀之制大享之外每歲立春立

夏季夏立秋立冬郊祀並依周禮其配食及星辰從祀
亦然貞觀中奉高祖配圓丘元皇帝配感帝餘依武德
制

大雩

周制月令建巳月大雩五方上帝

左氏傳曰龍見而雩
角亢見時周之六月

陽氣盛常旱故雩
為百穀以祈膏雨

其壇名曰雩禋於南郊之傍配以五

人帝

太昊配青帝炎帝配赤帝軒帝配
黃帝少昊配白帝顓帝配黑帝

命樂正習盛樂

月令云仲夏樂師修鞀鞀鼓均琴瑟管簫執干戚戈
羽調竿笙箎簧飭鍾磬祝故而俱作故曰盛樂也

舞

皇舞

析白羽為之形如帟也舞師云教皇舞帥而舞旱暵之事

月令命有司為民祈

祀山川百源百辟卿士有益於民者以祈穀實

天子雩上帝諸

侯雩山川卿士謂古之上公以下若勾龍社稷之類也何休注春秋公羊傳曰旱則君親之南郊以六事謝過自責政不善歟使人失職與官室崇歟婦謁盛歟苞苴行歟讒夫昌歟使童男童女各八人而呼雩也按月令本出於管子即周時人也至秦呂不韋編為呂氏春秋漢戴聖又集成禮記原其根本並周制若國大

旱則司巫帥巫而舞雩若旱暵則女巫舞雩漢承秦滅

學雩禮廢旱太常禱天地宗廟

雜論曰劉歆致雨具作土龍

武帝元

封六年旱女子及巫丈夫不入市成帝五年六月始命

諸官止雨朱繩反縈社擊鼓攻之是後水旱常不和寶干

曰朱絲縈社社太陰也朱火色也絲屬離天子伐鼓於社責羣陰也諸侯用幣於社請上公也伐鼓於朝退自

責也此昔人厭勝之術後漢自立春至立夏盡立秋郡國上雨澤

若少郡縣各埽除社稷公卿官長以次行雩禮以求雨

春秋繁露曰大旱雩祭而請雨大水鳴鼓而攻社閉諸陽衣旱興土龍山海經曰大荒

東北隅中有山名凶犁土邱應龍處南極殺蚩尤與夸父不得復上故下數旱而為應龍之狀乃得大雨郭璞曰今之上龍本此氣應自然冥感非人所能立土人舞僮二佾七日一變如

故事反拘朱索社代朱鼓禱賽以少牢如禮晉武帝咸

寧二年春旱因後漢舊典諸旱處廣加祈請五月祈雨

于社稷山川東晉穆帝永和中有議制雩壇於國南郊

之旁依郊壇近遠

阮湛云壇在巳地按得衛宏漢儀稱魯人為雩壇在城東南諸儒所說皆

云壇而今作壇又論語樊遲從遊于舞雩之下衛宏所說魯城東南舊跡猶在

祈上帝百辟早

則祈雨大雩社稷山林川澤舞僮八佾凡六十四人皆

皐服持羽翳而歌雲漢之詩齊明帝建武二年旱雩以

武帝配饗於雩壇梁武帝天監元年有事雩壇

壇於南郊之左

高及廣輪四大

帝以為雨既類陰而求之正陽其謬已

周十二大四陞

甚東方既非盛陽而為生養之始則雩壇應在東方祈

晴亦宜此地遂移於東郊十年帝又以雩祭燔柴以火

祈水於理為乖於是停用柴燎從坎瘞典

時議曹郎朱
異議曰按周

宣雲漢之詩毛注有瘞埋之文不見燎柴
之說若以五帝必柴則明堂又無其事

大同五年又

築雩壇於籍田兆內四月後旱則祈雨行七事

一理冤
獄及失

職者二賑鰥寡孤獨三省徭輕賦四舉進賢良五
黜退貪邪六命會男女恤怨曠七徹膳羞弛樂

天子

降法服七日乃祈社稷七日乃祈山林川澤常興雲雨

者七日乃祈羣廟之主于太廟七日乃祈古來百辟卿

士有益於人者七日乃大雩上帝徧祈前祈所有事者
大雩禮於壇用黃牯牛一祈五天帝及五人帝各依其
方以太祖配位於青帝之南五官配食於下七日乃去
樂又徧祈社稷山林川澤就故地處大雩國南除地為
墀舞僮六十四人皆衣皁服為八列各執羽翳每列歌
雲漢詩一章而畢旱而祈雨則報以太牢皆有司行事
唯雩則不報也若郡國縣旱請雨則五事同時並行
五事則謂黜退貪邪
以上如前議守令皆齋潔三日乃祈社稷七日不雨更齋祈

如初三變仍不雨復齋祈其界山林川澤常興雲雨者
祈而澍亦各有報陳因梁故事武帝時以德皇帝配文
帝時以武帝配廢帝時以文帝配牲用黃牛而以清酒
四升洗其首其壇墠配饗歌舞皆如梁禮天子不親奉
則太宰太常光祿行三獻禮其法皆採齊建武二年舊
典後魏文成帝和平元年四月旱詔州郡於其界內神
無大小悉洒埽薦以酒脯年登之後各隨本秩祭以牲
牢北齊以孟夏龍見而雩祭太微以五精帝於夏郊之

東為圓壇廣四十五尺高九尺四面各一陛為三壇外
營相去深淺并燎壇一如南郊若建午未申之月不雨
則使三公祈五帝於雩壇禮用玉帛有燎不設樂選伎
工端絜善謳詠者使歌雲漢之詩於壇南其儀如郊禮
隋制雩壇國南十三里啓夏門外道左高一丈周二十
丈孟夏龍見則雩五方上帝配以五人帝於上以太祖
配饗五官從祀於下牲用犢十各依方色若京師孟夏
後旱則祈雨行七事

如梁之七事

七日祈嶽鎮海瀆及諸山

川能興雲雨者又七日祈社稷及古來百辟卿士有益於人者又七日乃祈宗廟及古帝王有神祠者又七日乃修雩祈神州又七日仍不雨復從嶽瀆以下祈禮如初秋分以後不雩但禱而已皆用酒脯初請後二旬不雨者即徙市禁屠皇帝御素服避正殿減膳撤樂或露坐聽政百官斷傘扇令家人造土龍雨則命有司報州縣祈則理冤獄存鰥寡孤獨掩骼埋胔絜齋祈于社稷七日乃祈界內山川能興雲雨者徙市斷屠雨亦有報

唐武德初定令每歲孟夏雩祀昊天上帝於圓丘景皇帝配牲用蒼犢二五方上帝五人帝五官並從祀用方色犢十貞觀雩祀於南郊顯慶禮於圓丘開元十一年孟夏後旱則祈雨審理冤獄賑恤窮乏掩骼埋胔先祈嶽鎮海瀆及諸山川能興雲雨者皆於北郊遙祭而告之又祈社稷又祈宗廟每月七日皆一祈不雨還從嶽瀆如初旱甚則大雩秋分後不雩初祈後一旬不雨即徙市禁屠殺斷扇造大土龍雨足則報祀祈用酒脯醯

報准常祀皆有司行事

明堂

黃帝拜祀上帝于明堂或謂之合宮其堂之制中有一殿四面無壁以茅蓋通水水圜宮垣為複道上有樓從西南入名昆侖天子從之入以拜祀唐虞祀五帝於五府蒼曰靈府赤曰文祖黃曰神計白曰明紀黑曰元矩夏后氏曰世室商人曰重屋周人曰明堂其制度詳於禮經漢武帝元封五年祠太一五帝於明堂上座高皇

帝對之牲以太牢天子從昆侖道入始拜明堂如郊禮
禮畢燎堂下其明堂制從公玉帶所上黃帝時圖也後
漢光武建武三十年初營明堂明帝永平二年正月辛
未初祀五帝於明堂光武帝配五帝座位堂上各處其
方黃帝在未皆如南郊之位光武位在青帝之南少退
西面牲各一犢奏樂如南郊章帝元和二年二月壬申
宗祀五帝於孝武所作汶上明堂光武帝配如洛陽明
堂禮癸酉更告祀高祖太宗世宗中宗世祖顯宗於明

堂各一太牢安帝延光三年祀汶上明堂如元和故事
初建武營明堂其制上圓下方八窗四閨九室十二座
三十六戶七十二牖魏明帝太和元年正月丁未宗祀
文帝於明堂以配上帝祝稱天子臣某晉武帝泰始二
年正月丁丑宗祀文皇帝於明堂以配上帝又議明堂
宜除五帝之座同稱昊天上帝各設一座而已十年十
月詔復明堂五帝位東晉孝武帝太元十三年正月後
辛祀明堂車服之儀率遵漢制出以法駕服以袞冕宋

孝武大明五年依漢汶上儀設五帝位太祖文帝對饗
祭皇天上帝鼎俎彛簋一依太廟禮堂制但作大殿屋
十二間以應一周之數其餘煩雜一皆除之六年正月
帝親奉明堂祭五時帝以太祖配齊高帝建元元年七
月祭五帝之神於明堂有功德之君配明堂制五室從
王儉之議也明帝永泰元年有司奏以武帝配梁祀五
帝於明堂服大裘冕罇以瓦俎豆以純漆牲以特牛餽
膳准二郊若水土之品蔬菜之屬猶宜以薦郊所無者

並從省行禮自東郊而升從青帝始止一獻清酒無黍肉之禮請停灌及授俎十二年毀宋太極殿以其材為明堂十二間基准太廟以中央六間安六座悉南向東來第一青帝第二赤帝第三黃帝第四白帝第五黑帝配帝總配五人帝在阼階東上北向大殿後為小殿五間以為五佐室焉陳祀昊天上帝五帝於明堂牲以太牢粢盛六飯鉶羹蔬備薦焉武帝以德帝配文帝以武帝配廢帝以文帝配堂制殿屋十二間中央六間依前

代安六座四方帝各依其方黃帝居坤維而配饗坐依
梁法後魏文帝太和十三年四月經始明堂改營太廟
遷洛之後宣武永平延昌中欲建明堂而議者或云五
室或云九室至明帝神龜中復議之元叉執政遂營九
室值亂不成宗配之禮迄無所設北齊採周官考工記
為五室後周採漢三輔黃圖為九室並終不立隋文帝
開皇中議立明堂時將作大匠宇文愷依月令造明堂
木樣以獻帝異之然以衆議不定故不成終隋代祀五

方上帝於明堂常以季秋在雩壇上而祀其用幣各依其方人帝各在天帝之左太祖在太昊南西向五官在庭各依其方牲用犢十二皇帝太尉司農行三獻禮于青帝及太祖自餘皆有司助奠五官位於堂下行一獻禮有燎其省牲進熟如南郊儀唐武德初定令每歲季秋祀五方上帝於明堂元帝配五人帝五官並從祀迄于貞觀之末未議立明堂季秋大享則於圓丘行事永徽三年又奉太宗配祠明堂有司遂以高祖配五天帝

太宗配五人帝下詔造明堂內出九室之樣顯慶元年
禮官議太宗不當配五人帝太尉長孫無忌等議以高
祖躬受天命奄有神州為國始祖抑有舊章太宗道格
上元功清下黷拯率土之塗炭布大造於生靈請准詔
書宗祀於明堂以配上帝從之乾封初復議立明堂或
云九室或云五室以議不定又止武后垂拱四年二月
毀東都之乾元殿就其地造明堂因下詔曰時既沿革
莫或相遵自我作古用適於事今以上堂為嚴配之所

下室為布政之居來年正月一日可於明堂宗祀三聖以配上帝其月明堂成號為萬象神宮天授二年正月乙酉日南至親祀明堂合祭天地以周文王及武氏先考妣配百神從祠並於壇位以茅布席而祀武太后又於明堂後造佛舍高百餘尺始造為大風振倒俄又重營其功未畢證聖元年正月丙申夜佛堂災延燒明堂至明而盡未幾復令依舊規制重造明堂凡高二百九十四尺東西南北廣三百尺上施寶鳳俄以火珠代之

明堂之下圍遶施鐵渠以為辟雍之象天冊萬歲二年
三月造成號為通天宮四月又行親享之禮大赦改元
為萬歲通天明年九月又享於通天宮開元五年幸東
都將行大享之禮以武太后所造明堂有乖典制遂拆
依舊造乾元殿每臨御依正殿禮自是駕在東都常以
元日冬至於乾元殿受朝賀季秋大享依舊於圓丘行
事其大享儀具開元禮

朝日夕月

周制以柴祀日月星辰日壇曰王宮月壇曰夜明牲幣俱赤樂與祭五帝同禮神之玉以珪璧王搢大圭執鎮圭纁藉五采五就以朝日王服元冕所以尚質自朝至暮行祭之禮先以牲幣於柴上而燔之升煙於天以同五帝之義凡祭日月歲有四焉迎氣之時祭日於東郊祭月於西郊一也二分祭日月二也祭義云郊之祭大報天而主日配以月三也月令十月祭天宗合祭日月四也覲禮禮日於南門之外禮月於北門之外漢武帝

立二十八年始郊太一朝日夕月改周法不俟二分於東西郊常以郊泰時質明出行竹宮東向揖日其夕西向揖月魏文帝議其煩褻似家人之事乃以黃初二年正月乙亥朝日於東門之外前史又以正月非二分之義秘書監薛靖論云按周禮朝日無常日鄭元云用二分秋分之時月多東升西向拜之背實遠矣朝日宜用仲春之朔夕月宜用仲秋之朏淳于睿駁之引禮記云祭日於東祭月於西以端其位周禮秋分夕月並行於

上代西向拜月雖如背實亦猶月在天而祭之於坎不復言背也猶如天子東西遊幸拜宮猶北向朝拜寧得以背實為疑明帝太和元年二月丁亥朔朝日于東郊八月己丑夕月于西郊始為得禮晉因之武帝太康二年有司奏春分朝日寒溫未適不可親出詔曰頃方難未平故每從所奏今戎事已息此禮為大遂親朝日後周以春分朝日於東門外為壇如其郊用特牲青幣青圭有邸皇帝乘青輅及祀官俱青冕執事者青弁司徒

亞獻宗伯終獻燔燎如圓丘秋分夕月於國西門外為壇於坎中方四丈深四尺燔燎禮如朝日隋因之開皇中於國東春明門外為壇如其郊每以春分朝日又以國西開遠門外為坎深三尺廣四丈為壇於坎中高一尺廣四尺每以秋分夕月牲幣與周同唐二分朝日夕月於國城東西各用方色犢

大禘

臘

禘者索也自伊耆之代而有其禮古之君子使之必報

之是報田之祭也其神神農初為田事故以報之夏氏
曰嘉平商曰清祀周因之後名大禘以歲十二月合聚
萬物而索享之其樂則歛豳頌擊土鼓其服則皮弁素
服又云黃衣黃冠而祭息田夫也故既禘君子不興功
秦初因曰臘後復曰嘉平漢復曰臘季冬之月星迴歲
終陰陽以交勞農大享臘魏因之高堂隆議臘用日云
王者各以其行之盛而祖以其終而臘水始於申盛於
子終於辰故水行之君以子祖以辰臘火始於寅盛於

午終於戌故火行之君以午祖以戌臘木始於亥盛於卯終於未故木行之君以卯祖以未臘金始於巳盛於酉終於丑故金行之君以酉祖以丑臘土始於未盛於戌終於辰故土行之君以戌祖以辰臘今魏土德而王宜以戌祖辰臘博士秦靜議曰坤為土土位西南黃精之君盛德在未故魏以未祖易曰坤利西南得朋東北喪朋丑者土之終故以丑臘終而復始乃終有慶宜如前以未祖丑臘奏可之宋氏以水德王故祖以子臘以

辰後周常以十月禘隋初因周亦以孟冬下亥禘百神
開皇四年詔曰前周歲首今之仲冬建亥之月大禘可
也後周以夏后之時行姬氏之禘考之前代於義有違
其十月行禘者停可以十二月為臘始韋前制唐貞觀
十一年房元齡等議曰按月令禘法唯祭天宗近代禘
五天帝五人帝五地祇皆非古典今並除之季冬寅日
禘祭百神於南郊大明用犢二籩豆各四簋簠瓚俎各
一神農及伊耆氏各用少牢一籩豆等與大明同后稷

及五方十二次五官五方田畯五嶽四鎮四海四瀆以
下方別各用少牢一其日祭井泉於川澤之下用羊一
卯日祭社稷於社宮二十八宿五方之山林川澤邱陵
墳衍原隰鱗羽羸毛介水墉坊郵表畷貓虎及龍麟朱
鳥白虎元武方別各用少牢一每座籩豆各二簋簠飫
俎各一禋祭凡百八十七座當方年穀不登則闕其祀
禋之明日又祭社稷於社宮如春秋二仲之禮開元中
制儀季冬臘日禋百神於南郊之壇若其方不登則闕

之其儀具開元禮

靈星

周制仲秋之月祭靈星於國之東南漢興八年有言周興而邑立后稷之祠於是高帝命郡國縣邑立靈星祠常以歲時祠以牛言祠后稷而謂之靈星者以后稷又配食星也舊說星謂天田星也一曰龍左角為天田主穀乃於壬辰位祠之壬為水辰為龍就其類也縣邑令長侍祠舞者童男十六人舞象教田初為芟除次耕種

次芸耨驅爵及獲刈春籩之形象成功也東晉靈星配饗南郊不特置祀唐開元禮立秋之後祀靈星於國城東南天寶四載勅升為中祠

風師雨師及諸星等祠

周制大宗伯以實柴祀日月星辰以禋燎祀司中司命風師雨師月令立春後丑日祭風師於國城東北立夏後申日祀雨師於國城西南秋分日享壽星於南郊立冬後亥日祀司中司命司民司祿於國城西北後漢以

丙戌日祀風師於戌地以巳丑日祀雨師於丑地牲用
羊豕又於國都南郊立老人星廟常以仲秋祀之立心
星廟于城南常以季秋祀之晉以仲春月祀于國都遠
郊老人星廟季秋祀心星于南郊壇心星廟東晉以來
配饗南郊不復特立隋令太史局常以二月八日於署
廷中以太牢祠老人星兼祀天皇大帝天一太一日月
五星勾陳北極北斗三台二十八宿丈人星孫星都四
十六座凡應合祀享官示大鑒給除穢氣散藥先齋一

日服之以自潔唐開元二十四年七月勅所司特置壽星壇常以千秋節日修其祠典又勅壽星壇宜祭老人星及角亢七宿著之常式其儀具開元禮天寶四載勅風伯雨師並宜升入中祠仍令諸郡各置一壇因春秋祭社之日同申享祀至九月勅諸郡風伯壇置在壇之東雨師壇之西各稍北三數十步其壇卑小於社壇其祭官准祭社例取太守下充

方丘

神州后土附

夏以五月祭地祇商以六月周制大司樂云夏日至禮地祇於澤中之方丘其丘在國之北禮神之玉以黃琮牲用黃犢幣用黃繒王及尸同服大裘配以后稷其樂則大司樂云凡樂函鐘為宮太簇為角姑洗為徵南呂為羽靈鼓靈鼗孫竹之管空桑之琴瑟咸池之舞夏日至於澤中之方丘奏之若樂八變則地祇皆出可得而禮矣其神州地祇謂王者所卜居吉土五千里之內地名也玉用兩珪五寸有邸牲用黝犢幣用黑繒壇於北

郊築土為壇名曰泰折配亦以后稷其樂奏太簇歌應
鐘舞咸池以祭地祇備五齊七獻王每獻酒皆作樂一
終漢高帝定天下百度草創詔御史置祠祀官女巫其
梁山巫主祠天地武帝即位曰朕親郊上帝而后土無
配則禮不答也有司與太史令談祠官寬舒議之於是
東幸汾陰男子公孫滂洋等見汾旁有光如絳遂立后
土祠於汾陰睢上澤中為五壇壇一黃犢以高帝配牢
具已祠盡瘞而從祀者衣尚黃始用樂舞帝親望拜如

上帝禮至宣帝修武帝故事間歲正月一日至河東祠
后土成帝建始初徙河東后土於長安北郊後以帝無
繼嗣復汾陰后土如故帝崩皇太后詔復北郊長安平
帝立地與天合祭於南郊壇後漢光武中元元年營北
郊祀地祇在雒陽城北四里為方壇四陛遷呂太后於
園上薄太后尊號曰高后以配地祇正月辛未別祀地
祇於南郊位南面西上高皇后配西面北上皆在壇上
地理羣神從食皆在壇下中嶽食在未四嶽各在其方

海東河西濟北淮東江南山川各在其方高后用犢各
一五嶽共牛一四海四瀆共牛一羣神共牛二樂如南
郊既送神瘞俎實于壇北明帝永平二年正月上丁祀
南郊畢次郊魏明帝景初元年詔祀方丘所祭曰皇皇
后地以舜妃伊耆氏配北郊所祭曰皇地之祇以武宣
皇后配晉武帝受禪後泰始二年定郊祀北郊以先后
配是年有司奏古者丘郊不異遂并圓方二丘於南郊
更修壇兆其二至之祀合於二郊十一月庚寅帝親祠

於南郊自後方澤不別立東晉元帝太興二年北郊未
立地祇共在天郊明帝太寧三年七月始詔立北郊未
及建而帝崩成帝咸和八年於覆舟山南立北郊從祀
則五嶽四望四海四瀆五湖五帝之佐沂山嶽山白山
霍山醫無閭山蔣山松江會稽山錢塘江先農凡四十
四神江南諸小山蓋江左所立如漢西京闕中小水皆
有祭秩是月辛未祀北郊以宣穆張后配地魏氏故事
非晉舊也康帝建元元年正月辛未南郊辛巳北郊帝

皆親奉宋武帝永初二年親南北郊孝武帝大明三年
移北郊於鍾山北原與南郊相對後還舊處齊高帝受
禪建元二年正月次辛北郊犧牲之色因舊不改而無
配武帝永明三年議用次辛車服之儀率遵漢制梁武
帝制北郊為方壇於國之北常與南郊間歲正月上辛
以一特牛祀后土於壇上以德后配禮以黃琮五官先
農五嶽及國內山川皆從祀其南郊明堂用沉香取天
之質陽所宜也北郊用上和香以地於人親宜加雜馥

天監十六年有事北郊八座奏省除四望松江浙江五湖等座其鍾山白石山既土地所在並留之如故帝行一獻之禮陳武帝亦以間歲正月上辛用特牛一祀於北郊以皇妣昭后配及文帝天嘉中南郊改以高祖配北郊以德皇帝配宣帝即位以郊壇卑下更增廣之後魏道武瘞地於北郊以神元竇皇后配壇兆制同南郊五嶽名山在中壝內四瀆大川在外壝內后土神元后共用黑牲一玉用兩珪有邸幣用束帛五嶽等共牛一

祭畢瘞牲體於壇北亥地北齊制圓丘方澤並三年一
祭謂之禘祀以夏至之日禘崑崙皇地祇於方澤以武
德皇后配其神社稷岱嶽沂鎮會稽鎮云云山亭亭山
蒙山羽山嶧山崧嶽霍嶽衡鎮荆山內方山大別山敷
淺原山桐栢山陪尾山華嶽大嶽鎮積石山龍門山江
山岐山荆山嶠冢山壺口山雷首山底柱山析城山王
屋山西傾朱圉山鳥鼠同穴山熊耳山敦物山蔡蒙山
梁山嶧山武功山太白山恒嶽鑿無閭山鎮陰山白登

山碣石山太行山狼山封龍山漳山宣務山關山方山
苟山狹龍山淮水東海泗水沂水淄水濰水江水南海
漢水穀水洛水伊水漾水沔水河水西海黑水滂水渭
水涇水鄆水濟水北海松水京水桑乾水漳水呼沱水
衛水洹水延水並從祀其神州位青陞之北寅地社位
赤陞之西未地稷位白陞之南庚地自餘並內壝之內
內向各如其方合用牲十二儀同圓丘後周祭后土地
祇於國北郊六里為壇以神農配后土之祇神州壇在

其右以獻侯莫那配焉隋因周制夏至之日祭皇地祇於宮城北郊十四里方壇之上以太祖配神州迎州冀州戎州拾州柱州宮州咸州揚州其九州山川林澤邱陵墳衍原隰皆從祀地祇及配帝等牲用黃犢二神州以下用方色犢一九州山海墳衍等加羊豕各九孟冬祭神州於北郊亦以太祖武元皇帝配牲用犢二凡大祀養牲在滌九旬中祀三旬小祀一旬昊天五帝日月星辰地祇神州宗廟社稷為大祀星辰五祀四望為中

祠司中司命風師雨師諸星山川為小祀其牲方色難
備者聽以純色代煬帝大業元年孟冬祀神州改以高
祖文帝配唐制夏至祭皇地祇于宮城之北郊十四
里為方丘壇因隋制以景帝配神州五方嶽鎮海瀆山
林川澤邱陵墳衍原隰皆從祀地祇及配帝牲用黃犢
二神州用黝犢一嶽鎮以下加羊豕各五孟冬祭神州
於北郊景帝配牲用黝犢二貞觀中奉高祖配地郊永
徽中許敬宗等奏祭地之外別有神州謂之北郊殊無

典據遂廢神州之祀乾封初又詔依舊祀神州二年詔以高祖太武皇帝崇配方丘等祀太極元年正月初將有事于南郊有司議唯祭昊天上帝續議設皇地祇立開元二十一年夏至祀皇地祇于方丘以高祖配立冬祭神州于北郊以太宗配時房元齡議以神州者國之所託餘八州則義不相及今請除八州惟祭皇地祇及神州以正祀典開元十一年上自東都將還西京便幸并州至十二年二月二十二日祠后土于汾陰睢上

太史奏榮光出河休氣四塞祥雲繞壇日揚其光二十
年車駕欲幸太原中書令蕭嵩上言去十一年親祠后
土為蒼生祈穀自是神明昭祐累年豐登有祈必報禮
之大者且漢武親祠睢上前後數四伏請准舊年事至
后土行報賽之禮從之

社稷

顓帝祀共工氏子句龍為社烈山氏子柱為稷高辛氏
唐虞夏皆因之商湯為旱遷柱而以周棄代之欲遷句

龍無可繼者故止周制天子立三社祭法云王為羣姓立社曰太社於庫門內之西立之王自為立社曰王社於籍田立之亡國之社曰亳社廟門之外立之諸侯立三社祭法云諸侯為百姓立社曰國社於臯門之西立之自為立社曰侯社亦於籍田中立之而亦立亳社大夫以下立一社祭法云大夫以下成羣立社曰置社今之里社也但立名雖異其神則同皆以勾龍配之稷周棄配之社者五土之神稷者於五土之中特指原隰之

祇援神契曰稷者原隰之中能生五穀之祇也社壇在東稷壇在西俱北面壇築牆開四面門天子之社則以五色土各依方色為壇廣五丈諸侯則但用當方之色為壇皆植木以表其處又別為主以象其神大夫以下但各以其地所宜之木而立之漢高帝初起禱豐枌榆社二年東擊項籍還入關因命縣為公社後四年天下定詔御史令豐謹理枌榆社其後又令縣常以春三月及臘祠后稷平帝時王莽奏建立社稷自高祖除秦社

稷立漢社稷時已有官社以夏禹配而未立官稷至此始立之稷種穀樹徐州牧歲貢五色土一斗後漢光武建武二年立太社稷于洛陽在宗廟之右皆方壇無屋有墻有門而已二月八月及臘一歲三祀皆太牢具使有司祠郡縣皆置社稷太守令長侍祠牲用羊豕唯州所治有社無稷以其使官也魏自漢後但太社有稷官社無稷故常二社一稷也至明帝景初中立帝社明帝祭社但稱皇帝晉武帝太康九年詔曰社實一神其并

社之祀東晉元帝建武元年又依洛京立二社一稷宋
仍晉舊無所改作梁社稷在太廟西依晉元帝所創有
太社帝社太稷凡三壇至大同初又加官社官稷為五
壇陳依梁而帝社以三牲首餘以骨體薦粢盛為六飯
粳以敦稻以牟黃粱以簋白粱以簋黍以瑚粢以璉後
魏天興二年置太社太稷帝社於宗廟之右為方壇四
陛以二月八月日用戊皆以太牢勾龍配社周棄配稷
並有司侍祠北齊立太社帝社太稷三壇於國右每仲

春仲秋元辰及臘各以一太牢祭焉皇帝親祭則司農卿省牲進熟司空亞獻司農終獻後周立社稷於左帝親祠則冢宰亞獻宗伯終獻隋文帝開皇初建社稷並列於含光門內之右仲春仲秋吉戊各以一太牢祭牲色用黑孟冬下亥又臘祭之州郡縣二仲月並以少牢祭百姓亦各為社唐社稷亦於含光門內之右仲春仲秋二時戊日祭太社太稷社以勾龍配稷以后土配武太后天授三年九月為社至長安四年三月制社依舊

用八月神龍元年改先農壇為帝社壇於太壇西立帝
稷壇禮同太社太稷其壇不備方色異於太社又其年
五月詔於東都建置太社天寶三載二月詔社稷列為
中祀頗紊大猷自今以後升為大祀

山川

黃帝祭山川為多虞氏秩于山川徧于羣神周制四坎
壇祭四方以血祭祭五嶽以埋沈祭山林川澤一歲凡
四祭一者謂迎氣時二者郊天時三者大雩時四者大

稽時皆因以祭之秦并天下令祠官所常奉名山大川
鬼神可得而序於是自嶠以東名山大川祠山曰太室
恒山泰山會稽湘山水曰淮濟春以脯酒為歲禱因泮
凍秋涸凍冬塞其牲用牛犢各一牢具圭幣各異自華
以西名山七曰華山薄山嶽山岐山吳山鴻冢瀆山蜀
之岷山也名川四曰河祠臨晉沔祠漢中湫淵祠朝那
江水祠蜀亦春秋泮涸禱塞如東方山川而牲亦牛瀆
圭幣各異而四大冢鴻岐吳嶽皆有嘗禾其河加有嘗

醪此皆在雍州之域近天子都故加車一乘駟駒四灞
漚灋潏涇渭長水皆不在大山川數以近咸陽盡得比
山川祠而無車乘駟駒之加漢孝文十二年五穀不登
詔增修山川羣祀武帝因巡狩禮其名山大川用駒者
悉以木偶馬代行遇親祠者乃用駒後漢章帝元和二
年詔祀山川百神應禮者魏文帝黃初三年禮五岳四
瀆咸秩羣祀瘞沈圭璋宋孝武帝大明七年六月有司
奏奠祭霍山殿中郎邱景先議宜使太常持節牲以太

牢之具羞用酒脯時穀禮以赤璋纁幣器用陶匏藉用
茅席梁令郡國有五嶽者置宰祀三人及有四瀆若海
應祀者皆以孟春仲冬祀之後魏明元帝立五嶽四瀆
廟於桑乾水之陰春秋遣有司祭其餘山川諸神三百
二十四所每歲十月遣祠官詣州鎮徧祠有水旱災厲
則牧守各隨其界內而祈謁王畿內諸山川有水旱則
禱之太武帝南征造恒山祀以太牢浮河濟祀以少牢
過岱宗祀以太牢遂臨江登瓜步而還後周大將出征

遣太祝以羊一祭所過名山大川隋制祀四鎮東鎮沂
山西鎮吳山南鎮會稽山北鎮暨無閭山冀州鎮霍山
並就山立祠祀四海東海於會稽縣界南海於南海鎮
南並近海立祠及四瀆並取側近巫一人主知洒埽並
令多植松柏唐武德貞觀之制五嶽四鎮四海四瀆年
別一祭各以五郊迎氣日祭之東嶽岱山祭於兗州東
鎮沂山祭於沂州東海祭於萊州東瀆大淮祭於唐州
南嶽衡山於衡州南鎮會稽山於越州南海於廣州南

瀆大江於益州中嶽嵩山於洛州西嶽華山於華州西
鎮吳山於隴州西海及西瀆大河於同州北嶽恒山於
定州北鎮醫無閭山於營州北海及北瀆大濟於洛州
其牲皆用太牢祀官以當界都督刺史充先天二年封
華嶽神為金天王開元十三年封泰山神為天齊王天
寶五載封中嶽神為中天王南嶽神為司天王北嶽神
為安天王六載河瀆封為靈源公濟瀆封為清源公江
瀆封為廣源公淮瀆封為長源公會稽山為永興公嶽

山為成德公霍山為應聖公醫無閭山為廣寧公八載
閏六月封太白山為神應公其九州鎮山除入諸嶽外
並宜封公十載正月以東海為廣德王南海為廣利王
西海為廣潤王北海為廣澤王分命卿監詣嶽瀆及山
取三月十七日一時備禮兼冊祭其祭儀具開元禮

籍田

周制天子孟春之月乃擇元辰親載耒耜置之車右帥
公卿諸侯大夫躬耕籍田千畝於南郊冕而朱紘躬秉

耒天子三推以事天地山川社稷先古以為醴酪粢盛於是乎取之漢文帝制曰農天下之本遂開籍田朕躬耕以給宗廟粢盛漢舊儀云春始東耕於籍田官祀先農以一太牢百官皆從賜三輔二百里內孝悌力田三老帛種百穀萬斛為立籍田倉置令丞穀皆以給天地宗廟羣神之祀以為粢盛景帝詔曰朕親耕為天下先昭帝幼即位耕於勾盾弄田後漢明帝永平中二月東巡耕於下邳章帝元和中正月北巡耕於懷縣其籍田

儀正月始耕常以乙日祠先農及耕於乙地晝漏上水
初納執事告祠先農已享耕時有司請行事就耕位天
子三公九卿諸侯百官以次耕推數如周法力田種各
耰訖有司告事畢是月命郡國守皆勸民始耕魏氏雖
天子親耕籍田而藩鎮闕諸侯百畝之禮晉武帝太始
四年正月丁亥帝躬耕籍田于東郊詔曰近代以來籍
田止於數步之中空有慕古之名曾無供祀訓農之實
而有百官車徒之費今循千畝之制當與羣公卿士躬

稼穡之艱難以帥先天下於東郊之南洛水之北乘輿御木輅以耕以太牢祀先農自惠帝之後其禮遂廢東晉元年將修耕籍事終不行宋文帝元嘉二十一年將親耕先立春九日司空大司農京尹令尉度官之辰地八里之外整制千畝中開阡陌立先農壇於中阡西陌南設御耕壇於中阡東陌比將耕宿青幕于耕壇之上皇后帥六宮之人出種稑之種付籍田令耕日太祝令以一太牢祀先農如帝社儀孟春上辛後吉亥御乘耕

根三盖車駕蒼駟建青旂著通天冠青幘青袞佩蒼玉
蕃王以下至六百石皆衣青唯三臺武衛不耕不改章
服駕出如郊廟儀至籍田侍中跪奏至尊降車臨壇大
司農跪奏先農已享請皇帝親耕太史贊曰皇帝三推
三反於是羣臣以次耕王公及諸侯五推五反孤卿大
夫七推七反士九推九反籍令率其屬耕終畝灑種即
耰禮畢乃班下州縣悉具其禮焉齊武帝永平中耕籍
田用丁亥使御史乘馬車載耒耜從五輅後梁初依宋

齊禮以正月用事不齋不祭天監十二年武帝以啓蟄而耕改用二月乃與百官御事並齋三日沐浴裸饗侍中奉耒耜載於象輅以隨木輅之後普通二年又移籍田於建康北岸築兆域如南北郊別有望耕臺在壇東帝親耕畢登此臺以觀公卿之推反後魏太武帝天興二年春始躬耕籍田祭先農用羊一北齊籍田於帝城東南千畝內種赤梁白穀大豆赤黍小豆黑粳麻子大麥小麥色別一頃自餘一頃地中通阡陌作祠壇於陌

南阡西廣輸三十六尺四陞三壝四門又為大營於外
設御耕壇於阡東陌北每歲正月上辛後吉亥祀先農
神農氏於壇上無配饗祭訖親耕隋制於國南十四里
啟夏門外置地千畝為壇行籍田之禮播植九穀納于
神倉以擬粢盛穰臺以餉犧牲唐貞觀三年正月二十
一日太宗親祭先農籍于千畝之甸武后改籍田壇為
先農壇神龍初復改先農壇為帝社壇開元二十三年
二月親祠神農于東郊勾芒配禮畢躬御耒耜籍于千

畝之旬時有司進儀注天子三推公卿九推庶人終畝
明皇欲重勸耕籍遂進耕五十餘步盡壠乃止耕畢輦
還齋宮大赦侍耕執牛官皆加級賜帛其儀備開元禮

先蠶

周制仲春天宮內宰詔后帥外內命婦治蠶于北郊以
為祭服天子諸侯必有公桑漢皇后蠶于東郊後漢皇
后四月帥公卿列侯夫人蠶祠先蠶禮以少牢魏文帝
黃初七年皇后蠶于北郊依周典也晉武帝太康六年

蠶於西郊與籍田對其方也先蠶壇高一丈方二丈為
四出陛陛廣五尺在皇后採桑壇東南帷宮外門之外
而東南去帷宮蓋十丈在蠶室西南桑林在其東取列
侯妻六人為蠶母蠶將生擇吉日皇后著十二筭步搖
依漢魏故事衣青衣乘油畫雲母安車駕六騄音貴馬女
尚書著貂蟬佩璽陪乘載筐鉤公主三夫人九嬪世婦
諸太妃太夫人及縣鄉君郡公侯特進夫人外世婦命
婦皆步搖衣青各載筐鉤從蠶先桑二日蠶宮生蠶著

簿上躬桑日皇后未到太祝令質明以太牢告祠謁者
一人監祠祠畢撤饌頒餘胙於從桑及奉祠者皇后至
西郊升壇公主以下陪列壇東皇后東面躬桑採三條
諸妃公主各採五條鄉縣以下各採九條悉以桑授蠶
母還蠶室事訖皇后還便座公主以下乃就位設饗宴
賜絹各有差江左至宋孝武大明四年始於臺城西白
石里為蠶所設兆域置大殿又立蠶觀北齊為蠶坊於
京城北之西去皇宮十八里外有蠶宮方九十步牆高

一丈五尺其中起蠶室二十七口別殿一區置蠶宮令
丞宦者為之每歲季春穀雨後吉日使公卿以一太牢
祠先蠶黃帝於蠶壇上無配如祀先農禮訖皇后因親
桑於壇備法駕服鞠衣乘重翟帥六宮升桑壇東陞即
御座女尚書執筐女尚衣執鉤立壇下皇后降自東陞
執筐者處右執鉤者居左蠶母在後乃躬桑三條訖升
壇即御座內命婦以次就桑服鞠衣者採五條展衣七
條祿衣九條以授蠶母還蠶室切之授世婦灑一簿凡

應桑者並復本位后乃降壇還便殿改服設勞酒頒賚

而還後周制皇后乘翠輅率六宮三妃三嫔

音嫔婦
官名

御

媛御婉三公夫人三孤內子至蠶所以一少牢親祭進

奠先蠶西陵氏神禮畢降壇令二嬪為亞獻終獻因以


躬桑隋制先蠶壇於宮北三里為壇高四尺季春上巳

皇后服鞠衣乘重翟率三夫人九嬪內外命婦以一太

牢制幣祭先蠶於壇上用一獻之禮祭訖就桑位於壇

東面尚功進金鉤典制奉筐皇后採三條反鉤命婦各

依班採五條九條世婦於蠶母受切桑灑訖皇后乃還
唐顯慶元年三月辛巳皇后武氏先天三年三月辛卯
皇后王氏乾元二年三月巳巳皇后張氏並有事於先
蠶其儀備開元禮



通志卷四十二